

# POLOTE DOPO LETA

## TESALONAIKA SOSI EPATAMO

### OSIYODILIYA

---

**1** <sup>1</sup>Na Polote Sailasiko ega:walo Timotiko, ale la: Tesalonaika sosi epatamo me leta paliboma:. Nanitabola, la: nanitabokobi midipiate Nabiwi Godoko ega:walo Kawodawa Ya:su Kelisoko magumulo bilukulinamata. Modobola Godokono nilakapo tanalo ega:walo ebeno milo tanalote la:godolo na:pola:nama:na:<sup>a</sup>

#### Tesalonaika Sosi Epono Nanitabokobi Midi Tanalo

<sup>2</sup>Ale tete bilibilinomolo la: bilibilinomono tanaloma: Godotamo kalakala tabo eba adipatelo la: towetowe tabamo ebo wadipalatenakota. <sup>3</sup>Iyo, la:imano nanitabokobi midi magumulo kebe wadewade tanalo kosiyodilola:wenakima, ega:walo nilakapo kimalagidilo magumulo kebe woko elawonomamo kosiyodilawenaima, ega:walo me tetelo la:le kodakodalo eba lamota:onalo Kawodawa Ya:su Kelisokono pe tanaloma: demakopela:wenama, ale Nabiwi Godokono ololo apulo me iyaiya tanalo ka:dodolomatilina:<sup>b</sup>

<sup>4</sup>Aimano nanitabokobi midipi ekakiala:, a iyatawala Godote iyalo tetelo la: nilakapolo eba malagidilolenalo la: ebo uwatiyata la:le ebeno epoma: keda:wenama:. <sup>5</sup>Ebe mabuma: ale Ya:sukono Wade Tabo la:tamo dadaima:, ebe tetelo ebe tabote me opo epono mulo tabo gela magumulo kitania:. Ao, ebe tabote wiyasiya Godokono Uliyanano elawamo la:tamo pi, ebema: la:le la:imano tepo magumulo iyatawaimata ebe tabote Godogodone nanitabonomolo pemaiga.

---

<sup>a</sup> 1:1 Ali 17:1-9    <sup>b</sup> 1:3 1Kol 13:13; Kol 1:4-6

Numa:la:, ale la:imano nanitabokobi midi magumulo la:  
 kowalubilitama: egela epetapilo la: magumulo keba kunu ka:pilukulima:,  
 ebe tanalo la: iyatawalata.<sup>c</sup> <sup>6</sup>Ebene Godokono Uliyanagodone  
 da:pemaigana, la:le ebe kalakalago ebeno Wade Tabo delawa:ima,  
 ebe tetene wagilimate nanitabokobi midia:piate kawokawo temeteme  
 la:tamo eba ikalamelo, la: wiyasiya aimano ilukuli tanaloma: ega:walo  
 Kawodawa Kelisokono okoli tanaloma: a ebo ibamiatenapimata.<sup>d</sup> <sup>7</sup>Ebema:  
 la:imano osiyodilole tanalate atumu Ma:sadoniya ega:walo Guliki opo  
 epatamo ulima: eda:iya, la:le keba kunu kilukula:wenama iba:te ibino  
 nanitabokobi midi magumulo eba kunu na:kilukulinama:na:. <sup>8</sup>Wiyasiya  
 Kawodawano tabote la:imano osiyodilole magumudo Ma:sadoniya  
 ega:walo Guliki opo epo ibi kapiyatamo ka:toa:, iyo, ebe tabote tuteleno  
 diyamo keba kunula:ka: iyaiya mulu opamo eba kunu a:ti, ebema: ale  
 ebe opo epatamo da:nemaimima:, ale tabo kiyawaoa:no iba:te la:imano  
 nanitabokobi midi tanalo iyalo olowiya. <sup>9</sup>Numa:la:, ibi bilibilinomate  
 negelana ale Wade Tabo la:tamo dadaima: la:le a kalakalago keba kunu  
 kuwatea:ima, ega:walo iba:te na:kegelana la:le a:da: elemasigi uliyanano  
 ida:da:li amamalatele magumune Igilodawa ega:walo Nanidawa Godoko  
 amamate tanalamo keba kunu kolobila:ima, <sup>10</sup>ega:walo Godokono Gudute  
 Unu Duliyomolone pema: la:le ebe tanalo demakopela:wenama, iba:te ebe  
 tanaloma: atumu na:kegelana.

Me tanalo nanitabola, Godote ebeno Gudu a:e magumune  
 igilamo adipatiya, ebema: me Ya:sute a nanitabokobi midipino igilo  
 na:mula:leamena, Godogodone da:pemene ebe dowa tanalo kawonomote  
 a puwatekapoma:.

### Polote Tesalonaika Kowo Duliyomololo Godokono Woko Keba Kunu Kosiyodilonamile

**2** <sup>1</sup>Ebema: aimano nanitabokobi midipi ekakiala:, la: iyatawanomolata  
 ale la: magumulo woko osiyodiloma: da:pelaima: ebe woko  
 magumulo wadewade da:ima:te emaimiya. <sup>2</sup>Ega:walo la: iyatawalata,  
 ale la:tamo pelamea:no dopamo Pilipai duliyomololo nanitabokobi  
 midia:piate a malogoelo temeteme atamo keba kunu kikaeami, ebene ale  
 la:imano duliyomolamo da:pelaima: ebolo epetapi bilibilinomate atumu  
 a kawonomamo odiyoboema: eba wagelelo, wiyasiya aimano Godote  
 tole tanalo iyabaiamo iyatiame, ale ebegodone da:pena ebe Wade Tabo  
 la:tamo wadenomamo ebo pa:kiyawaima:.<sup>e</sup>

<sup>3</sup>Nanitabola, la:le me Wade Tabo nanitabokobi ka:mida:ema: ale  
 la: danaletia, ebe tetelo ale ele gabu odidi tanalodo ega:walo tepo  
 magumuno kalawikalawi wokino tanalodo iyaiya a:da: elemasigi tabo

<sup>c</sup> 1:5 1Kol 2:4-5    <sup>d</sup> 1:6 Ali 17:5-9    <sup>e</sup> 2:2 Ali 16:19-24; 17:1-9

kegela:. <sup>4</sup>Ao, aimano tanalo eba kunua:, ale wiyasiya epatamo Godokono nani tabo kapiya a:kiyawaonakoma:, mabu Godote a ebeno wadewade wokopima: ka:milo ebeno Wade Tabo kiyawao woko atamo ikaeamiya. Ebema: ebe woko osiyodilo magumulo aimano woki ma kunu kitana:, ale epo eba kalakalailamenalo iba:te a kowalogoenama:, ao wiyasiya aimano ubi niyatinkoma: Godoko kapiya kekalakalaiminama:, mabu ebete aimano tepo magumuno tanalo bilibilinomo eba ulamelo ebo anagilameleamenako.<sup>f</sup> <sup>5</sup>Ebema: la: iyatawalata, a la:go eba pilukulilo ale unu gabodo la: walogolelo la:tamo iyaiya nilakapo tabo ka:kiyawaonakia: inamabu epetapi ega:walo mani la:godone kuwatema:, iyo, Godote aimano nanitabo tanalo atumu iyatawala aimano tepo magumuno wokilo ebako a:da: elemasigi tanalote la:tamo kitanatia!: <sup>6-7</sup>Numa:la:, ale Kelisokono alibolepima: dedaonama: ebe tanalo kawonomamo malagidiloa:no ale la: kanaletanakia: iyaiya inamabu epetapi ega:walo mani atamo gito kikaeamo:ema:, iyo, aimano woko osiyodilo magumulo ale epono amama tanalo la:godolo ega:walo epetapiagodolo kowadinakia: wiyasiya ale la: wadenomamo anikulamenapiata, menokote ebeno gudi wadenomamo danikulamenanako eba kunu.

<sup>8-9</sup>O aimano nanitabokobi midipi ekakiala:, ale la: kawonomamo nemalagidilolenata, ebe mabuma: ale Godogodone da:pena ebe Wade Tabo la:tamo eba ikalamelo la: mabuma: aimano igilo iyabaiamo ebo alomonakima:. Nanitabola, aimano nilakapo la:tamo da:pesoma: keda:namia:, ebema: ale la: magumulo temeteme woko eba osiyodilolo kebe kodakoda tanalo kulamenakima:, na iyatawala la: ebe tanalo ka:dodolomatila:wena:. Iyo, idoko ega:walo egela ale aimano kotamo woko osiyodilonakima: a a:ka:tuwa: aimano iyaiya modoboa: tanalo ulaema:, mabu ale Godokono Wade Tabo kiyawao woko la:godolo eba posiyodilolo ale temeteme da:peso idi la:tamo kikalamekama: ubia:noma: eda:onakima:.<sup>g</sup>

<sup>10</sup>Nanitabola, ale ebe tetelo la: nanitabokobi midipi magumulo kebe tanalo kosiyodilolenakima: ebe tanalo ebe tuputupuinomola, kuba osiyodilo tanalo kapiya idite agodolo kitananakia:. Iyo, la: ega:walo Godoko la:le aimano wade-talena ilukuli tanalo iyatawanomolata, <sup>11</sup>ega:walo la: me tanalo idi iyatawalata, nabiate ibino gudi keba kunu kowalubilinake, ale la: bilibilinomo eba kunu walubilinakiata.<sup>h</sup> <sup>12</sup>Numa:la:, iyaiya tete epetapilo ale la: wade tabono tanalamo eba walubililoo la: analenakiata la:le la:imano ilukuli magumulo Godokono wadewade ga:limapi gudima: keda:wenama:, mabu Kawodawate la: ka:la:mi katepana: la:le ebeno Kowo Elawodawano duliyomolono pukuilame tanalo kawonomo eba:go kapimiya kelawa:ema:. <sup>13</sup>Ebema:

<sup>f</sup> 2:4 Gal 1:10   <sup>g</sup> 2:8-9 Ali 20:34   <sup>h</sup> 2:11-12 Ali 20:31

modobola ale tete bilibilinomolo Godotamo kalakala tabo begelanama;, mabu Godogodone da:pena la:le ebe tabo agodone dolowiaima, ebe tetelo la:le me opo lumagino taboma: kegelawea:, wiyasiya la:le kodakodalolawa:wete Godokono nani tabonomoma: midimata. Nanitabola, ebe tabo Godokonola, ebema: kebe lumagite ebe nanitabikobi da:midina, ebe tabote ebe magumulo wade woko bosiyodilonamene.<sup>i</sup>

**Ya:suko Mabuma: Temeteme Tanalate Tesalonaika  
Nanitabokobi Midipiatamo Demaimiya**

<sup>14</sup> Ebema: aimano nanitabokobi midipi ekakiala:, Godokono tabote la: magumulo woko dosiyodilona, a ebe tanalo iyatawala mabu ebeno sosi epate Yudiya opono iyaiya duliyomololo dilukuliona, ebe nanitabokobi midipiatamo kebe temeteme tanalate kemaimiyale ebe atu tanalate la:tamo a:kemaimiya. Iyo, la:imano opo epate la:tamo kebako temeteme kikalamezia, dopamo tetelo Yu epono opolo epetapiate Ya:su Kelisokono waloma:tapiatamo ebako atu temeteme ebe kikalamiya.<sup>j</sup> <sup>15</sup> Ebema: modobola la: ebe nanitabokobi midia: Yu epono tanalo nemalagidilala:, Godokono elawo tanalote iba:tamo kawonomamo itana mabu iba:te epo nodiyobolena ebetamo pelaema! Iyo, iba:te dopamo Godokono woki awokalimipi danakapulamenakiya, ebene ebe atu gabodo Kawodawa Ya:suko akanakapumiya ega:walo a ebe nanitabokobi midipi aimano opone elawamo gito a:na:ma:ateiya.<sup>k</sup> <sup>16</sup> Ebene ale aimano opo atepate mulu opolo dilukuliona ebe Yua:piatamo tolamete Godokono igilo mula: tabo iba:tamo kiyawao eba nowagilimilo, wiyasiya ebolo Yu epo epetapiate a odiyoboema: atumu kowageliya. Ebema: num:a:la:, iba:te uwomu tetelo me kawo kubanomo idi eba osiyodilolo Godokono ololo apulo ibino kuba osiyodilole tanalate etabokai, me mabuma: ebeno kawo dowa tanalonomote iba:tamo a:pemaiga!

**Polote Tesalonaika Sosi Epatamo Walo Toma: Ubi Da:kiyatiya**

<sup>17-18</sup> Ebema: aimano nanitabokobi midipi ekakiala:, ale la: da:miyapatia ebe tetene wagilimite me teta:mo pemaiga, ale tete da:pesolo aimano apa:mo iyaiya eba ilukula:tepalo wiyasiya aimano tepo magumuno wokilo ale la:go kapiyanomoma: eda:onatima:. Ebe mabuma: tete bilibilinomo epetapilo ale ubi kawonomamo iyatinakima: la:tamo kapimiya pelamete la:imano ololo walo ka:ka:pulaema:, ega:walo tete epetapilo na Poloko na a:ka:tuwa: pema: wagelenakimo wiyasiya Saitanate a nodiyoboenaki.

<sup>19</sup> Nanitabola, aimano ubi la:tamo kawonomamo bitana. Numa:la:, la: aimano kalakala tanalono mabulata, ebema: ale Ya:sukono pe tanalo nemakopelenama: mabu ale la: ebeno ololo apulo walo da:kulametamene,

<sup>i</sup> 2:13 2Tes 2:13   <sup>j</sup> 2:14 Ali 17:5   <sup>k</sup> 2:15 Ali 9:23,29; 13:45,50; 14:2,5,19

ebe tetelo aimano kalakalate kawonomoma: ka:keda:mene. Iyo, ale Saitanatamo gowela magumulo delaima; la: ebe ebe wato kikopulata,<sup>1</sup> 20 mabu ale Ya:su Kelisoko magumulo eba ilukulinalo, la: aimano amama tanalolata ega:walo aimano kalakala mabulata.

### **Polote Tesalonaiaka Sosi Epo Ka:nowalubilima: Timotiko Danalibiya**

**3** <sup>1</sup>Numa:la:, ale la:tamo kapimiya pelaema: gabu nipo dowadima:, ebema: aimano tepo magumulo woki bilibili: eba eda:olo ale negelima: “Modobola a epetapiate me A:tenese duliyomololo eba ilukulli,”<sup>2</sup> a magumulo aimano nanitabokobi mididawa ekawi Timotiko kapiya kanalibomalema:.” Nanitabola, ale Ya:sukono Wade Tabo da:kiyawaonakoma: Timotite ago kapimiya Godokono wade woko bosiyodilon, ebema: ale ebe la:tamo apalibima: ebete la: eba powalubililo la:le nanitabokobi midi magumulo kodakodal kelamota:wenama:;<sup>3</sup> mabu a ubia:nola nanitabokobi midia:pino temeteme ikalame tanalodo la: magumulo idi kapiyate kubanu alegama:. La: iyatawanomolata mako temetema:te Godokono ubilo a nanitabokobi midipiatamo pemaimionaka,<sup>4</sup> mabu a la:go eba pilukulilo ale la: ma kunu analiata, “Nanitabokobi midia:piagodone temeteme tanalate atamo ka:pemaimiomana:.” Iyo, nanitabola, me tetelo la: iyatawanomolata ebe tanalote la:tamo emaigi.<sup>5</sup> Ebema: numa:la:, nale me tanalo eba malagidilolo Timotiko ebema: palibimo, iyo, la: mabuma: nale naimano tepo magumulo woki bilibili: eba eda:lo ubi ebo iyatimo, ebete la:go eba pokolilo la:imano nanitabokobi midi tanalo wadenomamo ka:pulamelelametama:. Ebe tetelo na ubia:nola la: epetapiate Saitanakono kuba tanalamo wabuga:ta gabamo da:guda:ima ebete ebe tanalo puima:, mabu mako tanalote la:tamo nemaigataleka:, ale kebe kodakoda woko la: magumulo kosiyodilima: ebe wokote gito ba:kubana:!

<sup>6</sup> Wiyasiya Timotite la:godone atamo walo da:ka:pi, ebe tetelo ebete la: mabuma: wade tabonomo atamo adai, ma kunu la:imano nanitabokobi midi tanalote Godotamo kodakodal itana ega:walo la:imano nilakapo epetapiatamo atumu ba:kitana, ega:walo ebete a napanai la: tete bilibilinomolo a nilakapo keba kunu kemalagidiloa:wenama, iyo, ale la: ulaema: ubi kawonomamo diyatinama: la: atumu a uaema: ubi na:kiyatnamata.<sup>P</sup> <sup>7</sup>O aimano nanitabokobi midip ekakiala:, Timotite la:imano nanitabokobi midi tanaloma: a da:pikiyawaoami ebe tabote a nanitabolo kalakala ikaeami! Ebe mabuma: ale aimano mibomibo tanalo ega:walo iyaiya temeteme tanalo kawonomamo a:kemalagidilema:;<sup>q</sup> <sup>8</sup>mabu kebe tetelo la: Kawodawa Ya:suko magumulo kodakodal

<sup>1</sup> 2:19 Pil 2:15-16; 4:1; 2Tes 1:4   <sup>m</sup> 3:1 Ali 17:15   <sup>n</sup> 3:2 Ali 16:1-3   <sup>o</sup> 3:3 2Tim 3:12

<sup>P</sup> 3:6 Ali 18:5   <sup>q</sup> 3:7 2Tes 1:4

delamota:wenama, ale ebe tanalo dolowima: ebe tetelo a kawo kalakala lawete aimano ilukuli magumulo woki bilibili tanalo idite nanitabolo a:kitanamene. <sup>9</sup>Ebema: ale Godokono ololo apulo delamota:onama: la: mabuma: aimano kalakala beda: kawonomola:ka! Iyo, ale aimano kalakala tabo ebetamo eba wadipalatelelo, <sup>10</sup>egela ega:walo idoko bilibilinomolo ebe na:toweomenakoma: ebete a gabu diyatuamemene, ale pelamete la:imano ololo eba pulamelo kebe modobo: tanalate la:imano nanitabokobi midi magumulo da:pola:na ebe iyaiya tanalo ka:pa:tuputupuilaemalema:

<sup>11</sup>Ebema: modobola aimano Nabiwi Godoko ega:walo aimano Kawodawa Ya:suko iba:te gabu nosiyodiloma:na: ale la:tamo ka:pelaema:<sup>r</sup> <sup>12</sup>Ega:walo modobola Kawodawate la:imano tepo magumulo ebeno nilakapo kimalagidilo tanalo kawonomoma: na:midimene, ebene la: magumulo epetapiate epetapi nilakapolo eba malagidilolelo la:le opo epo epetapi bilibilinomo atumu kawonomamo bemalagidilolenamata, ale la: keba kunu kemalagidiloletana eba kunu. <sup>13</sup>Ega:walo modobola aimano Kawodawa Ya:sute me gabodo la:imano tepo magumu na:kodakodailaemene, ebene ebete ebeno talena waloma:tapi bilibilinomago walo da:ka:pemene, ebe tetelo la:le aimano Nabiwi Godokono ololo apulo tuputupupinomoma: eba eda:olo ebo ka:nelamota:onamamota, mabu la: magumulo kapiya kuba idite a:kitanamene.

### Nanitabokobi Midipiate Ibino Ilukuli Magumulo Godoko Keba Kunu Na:kekakalakalaiminama:na:

**4** <sup>1</sup>Ebema: aimano nanitabokobi midipi ekakiala:, la: dopamo agodone iyatawaimata la:imano ilukuli magumulo la: Godoko keba kunu na:kekakalakalaima:wenama, ebema: aimano kalakala bitana mabu la: eba kunu bilukulinamata. Ebene me leta uwomu apulo ale me tanaloma: la: Kawodawa Ya:sukono mailamo walo kawonomamo nakanaleta, modobola la: ebe tuputupu ilukuli magumulo eba pola:nalo la:imano wadewade osiyodilole magumulo napepeonala:, <sup>2</sup>iyo, ale dopamo Ya:sugodone uwatete la:tamo dikalametia ebe iyaiya totomu tabono tanalo la: iyatawalata. <sup>3</sup>Ebema: la: mabuma: Godokono ubi ma kunula, la:le ebeno talena okoli tanalo magumulo eba pola:nalo buwele pilo tanalo ega:walo dubu idino kamiyale pilo tanalo makomako kuba tanalo ako-osiyyodilola:la:<sup>s</sup> <sup>4</sup>Modobola, la: bilibilinomate wiyasiya wadewade ega:walo talena ilukuli woki kapiya nuwatiyalal:, tete bilibilinomolo la:imano kateneno kuba ubi tanalate la:imano tepo magumuno Wade mulo wokino tanalamo nanitabolo ka:tudila:onama:<sup>t</sup> <sup>5</sup>Numa:la:, piyate

<sup>r</sup> 3:11 2Tes 2:16   <sup>s</sup> 4:3 1Tes 5:23; 1Pit 1:16   <sup>t</sup> 4:4-5 1Kol 6:13

ibino kateneno iyaiya ilipo tanalo elawonomamo dowaloma:talena ebe kuba osiyodilolepiate Godokono tanalo iyatawa:, ebe mabuma: ebe ubia:nola la:le ibi keba kunula:ka: ebako epoma: eda:oma:. <sup>6</sup>Iyo, la:le nanitabokobi midi magumulo kapiya alailame gudima: eba eda:onalo, modobo: idite ebeno lumagitamo kateneno kuba ilipo tanalo osiyodiloma:, ega:walo modobo: idite a:da: elemasigi gabodo ebeno ekawino wade tanalo idi pilolo laema:.

Nanitabola, ale dopamo la: kawiya ma kunu analiata, piyate mako kuba tanalo dosiyodilolena Godote iba:tamo wiya nanitabolo kikalaemene.

<sup>7</sup>Numa:la:, Godote a nanitabokobi midipiate ebeno talena okoli tanalo magumulo ka:pola:nama: a iyalo eka:miya, iyo, ebe ubia:nola ale kateneno kubakuba ubi tanalonosiyodilole magumulo ilukulinama:. <sup>8</sup>Ega:walo me tanalo idila. Godote ebeno Uliyana la:tamo nikalamenata la:le ebeno talenapima: keda:wenama:, ebema: la: magumulo idite aimano iyatulame tabo ubia:noma: deda:na, ebete me opo lumagino totomu taboma: ebeno ubia: tanalo kawokalimina:, ao, ebeno osiyodilo magumulo ebete Godokono totomu taboma: ebeno ubia: tanalo awokalimina.<sup>y</sup>

<sup>9-10</sup>Ega:walo modobola la: me tanalo idi na:kuma:la:, la:le nanitabokobi midipi nilakapo kemalagidilola:wenama: Godote la: dopamo iyatulamiata. Nanitabola, la:le ebeno tabamo tudila:olo Ma:sadoniya opono nanitabokobi midipi ekaki bilibilinomo na:nilakapoilamenakomata, wiysiya aimano ekakiala:, kuba: ale me leta magumulo Godokono nilakapo kimalagidilo tanaloma: la: walo kakanaletama:, iyo, a ubi kawonomola me kapiya tabo idi la: kanalema:ta, modobola la: Godokono nilakapo magumulo walo nakapepeala:.<sup>w</sup>

<sup>11</sup>Ebema: la: la:imano ubi kawonomamo ma kunu niyatinala:, la:le epo etetapiago milolo eba ilukulinalo etepatino tanaloma: tabo gelano la: a:ka:tuwa: la:imano ilukuli tanalo kapiya wadenomamo kulaemamota. Ega:walo kebe iyaiya modobo: tanalo la:godolo da:pola:na, mani woko kelekele osiyodilole magumulo la: a:ka:tuwa: ebe tanalo na:modoboilamenakiyal:a:, ale la: dopamo keba kunu kanaletia eba kunu.<sup>x</sup>

<sup>12</sup>Numa:la:, la: me tanalamo nanitabolo da:tudila:oaema, ebe tetelo la: mani ega:walo inamabu epagodone gito uwatema: temeteme iba:tamo a:kikalama:ema, iyo, ebe mabuma: nanitabokobi midia:piate la:imano tuputupu osiyodilole tanalo dulamelelametamene iba:te la: wadewade epoma: ebo kegelama:na:.

### Kawodawa Ya:sukono Pe Tanalo

<sup>13</sup>Aimano nanitabokobi midipi ekakiala:, piyate nanitabokobi midi magumulo da:elaiya, a ubila la: ibino nanitabo tanalo wadenomamo

<sup>u</sup> 4:7 1Pit 1:15-16    <sup>v</sup> 4:8 Luk 10:16; 2Kol 1:22    <sup>w</sup> 4:9-10 Yon 13:34    <sup>x</sup> 4:11 Epe 4:28

niyatawala: la:le ibino a:elao tanaloma: topo magumulo mibomibo lawekapoma:. Numa:la:, nanitabokobi midia:piate ibino epono a:elao tanaloma: kubanomamo iminaka, mabu iba:te Ya:sukono kalakala tanalo ega:walo ebeno pe tanaloma: olowiolo kemakopelena:. Wiyasiya la: ibi keba kunula:ka: eba kunu akoeda:oala:, <sup>14</sup>mabu a nanitabokobi midipiate iyatawala, Ya:sute da:iya ebete igilamo walo a:kemaigiya, iyo, ebe mabuma: piyate nanitabokobi midi magumulo da:elaoma:na: Godote iba:tamo igilo walo ka:kikalaemene, ebete Ya:sutamo igilo keba kunu kikamiyale eba kunu, ebema: kalakala kawonomola, ebeno pe egelalo ebete ibi atamo walo ka:kemagaelemene!<sup>y</sup>

<sup>15</sup> Ebema: ka:lo ale la: diyatulametita, me tabo Kawodawano iyatulame tabola. Nanitabola, Ya:sukono pe egelalo a piyate nanitabokobi midi magumulo igilolo dilukulionama:, Unu Duliyomolamo ka:nodoloma: piyate dopamo da:elaiya ale ebe nanitabokobi midipi a:ka:dopalaema:.<sup>z</sup>

<sup>16</sup> Numa:la:, ebe egelalo Godote ebeno tabo madodo unamo adipatelo modobo tabo degepatemene, ebe tetelo me opo epate Godokono tutele diyamo ega:walo ebeno elawo nopalawanomono tabo madodo olowiote Kawodawa Ya:sute Unu Duliyomolone ebo ka:piwisigamene. Ebema: piyate nanitabokobi midi magumulo da:elaiya, iba:te dopamo igilamo maimiote, <sup>17</sup>ebene a piyate me opolo igilolo dilukulionama: Ya:sute a uwatete, a nanitabokobi midipi bilibilinamate eba:go tobolo unulo ebo kanaladabutimalema:. Nanitabola, ebe tetene wagilimite ale Kawodawa Ya:suago uwomua: tetelo bilukulinama:, <sup>18</sup>ebema: modobola la: magumulo me tabono tanaloma: etepati ate etepati wadenomamo nowalubiunakiyal:a:.

### Nanitabokobi Midipiate Ya:sukono Pe Tanaloma: Olowiolo Nemakopelenama:na:

**5** <sup>1-2</sup>Ebema: aimano nanitabokobi midipi ekakiala:, Kawodawa Ya:sukono Kowo Egelalo kebe iyaiya tanalate demaimioma:na:, ebe tanaloma: nale me leta magumulo la: kawiya akanaletama, mabu la: iyatawanomolata pilo dubute idokolo keba kunu ka:penakole Ya:sute ebe Egelalo eba kunu ka:pemene.<sup>a</sup> <sup>3</sup>Iyo, ebe egelate pea:no dopamo nanitabokobi midia:piate ma kunu begelanakoma:na:, “Aimano ilukuli tanalo wadenomola, ega:walo tole tanalote agodolo kitana: mabu me opo epate milo tanalo magumulo ilukulina.” Wiyasiya ebe tetenomolo Godokono kowo olalati tanalonomote iba:tamo gito ka:pemaigamene, lamitu kamiyalete iyaiya tanalo eba osiyodilolelo ebeno gudu alaimi temetemete ebetamo keba kunu ka:pemaiganakole eba kunu. Nanitabola,

<sup>y</sup> 4:14 Lom 14:9; 1Kol 15:3-4,12   <sup>z</sup> 4:15-16 1Kol 15:51-52   <sup>a</sup> 5:1-2 Mat 24:42-43;  
2Pit 3:10; Awo 3:3

ebe tetelo nanitabokobi midia:piatamo da:pemaigamene, iba:te ebe olalati temeteme magumune alautioma: gabu nipo kowadima:na:<sup>b</sup>

<sup>4</sup>O nanitabokobi midipi ekakiala:, piyate idoko kawonomolo u delaonanaka iba:te pilo dubuno pe tanalo kiyatawaonakoa:, wiyasiya la:imano tanalo eba kunua!: La: idoko magumulo kilukula:wena: wiyasiya la: Kawodawano pe tanaloma: olowiolo ilukulinamata, ebema: ebete ebeno Kowo Egelalo da:pemene la:le ebe tanalo uma:wete a:kela:wa:omata. <sup>5</sup>Numa:la:, la: bilibiliomate alo teteno gudima: eda:onamata, iyo, a nanitabokobi midipi idoko teteno gudia; <sup>c</sup> <sup>6-7</sup>ebema: epetaipate u delaonanaka ale ebako epoma: eda:oma: modoboa:, mabu idoko tete ebe ibino u lao tetela ega:walo idoko tete ebe ibino gamoda nio tetela. Modobola ale wiyasiya tuputupu wokilo eba ilukulinalo aimano Kawodawano pe tanaloma: olowiolo kemakopelelana malema;, <sup>8</sup>iyo, a nanitabokobi midipi a egela teteno epola, ebema: modobola ale tete bilibiliomolo tuputupu wokilo bilukulinama:. Ega:walo modobola ale Godoko nanitabokobi midi tanalo ega:walo nilakapo kimalagidilo tanalo, ebe netewa kawokawo tanalo aimano apa:mo ka:pupulimalema:, gowelaodawate ebeno negege inamabu da:pulinako eba kunu. Ega:walo ale aimano igilo mula: tanalo Ya:sugodone nanitabolo laema:, modobola ale ebeno pe tanaloma: olowiolo bemakopelelana:, mabu ebako olowio tanalo ebe goweladawano diba keba kunula:ka: eba kunula.<sup>d</sup>

<sup>9</sup>Numa:la:, Godote a keka:miya: ebete aimano kuba osiyodilole mabuma: ebeno kawo dowanomo magumulo wiya atamo kikaeaema:. Ao, ebete wiyasiya a uwateiya ale aimano Kawodawa Ya:su Kelisokono woko tanalodo aimano igilo mula: tanalo kelaema;, <sup>10</sup>mabu Ya:sukono a:e tanalono magumu ma kunula, ebe ubila ale uwomua: tetelo eba:go kilukulinama:. Ebema: kalakala kawonomola, nanitabokobi midipi magumulo piyate dopamo da:elaiya ega:walo piyate ebeno pe egelalo me opolo dilukulionama:na: ibi bilibiliomate kapiya tetelo ibino nanitabo kalakala ebegodone ka:nelaema:na:. <sup>e</sup> <sup>11</sup>Iyo, me mabuma: modobola la: la:imano tabono tanalamo ega:walo la:imano osiyodilole tanalamo la: magumulo epetaipate epetaipi wadenomamo nowalubiunakiyalu:, la: me tetelo keba kunu kosiyodilawenama eba kunu.

### Polote Leta Uwomu Apulu Iyatulame Tabo Epetapi Da:kiyawaiya

<sup>12</sup>Aimano nanitabokobi midipi ekakiala:, ale la: analeta la:imano nanitabokobi midi magumulo piyate Kelisokono nanitabo gabu ega:walo okoli tanalo la: iyatulaema: woko dosiyodilona, modobola la: la:imano tepo magumuno wokilo ibi unamo eba wadipalatelelo ibino

<sup>b</sup> 5:3 Mat 24:39; Luk 21:34-35    <sup>c</sup> 5:5 Lom 13:12    <sup>d</sup> 5:8 Ais 59:17; Epe 6:14,17

<sup>e</sup> 5:10 Lom 14:8-9; 1Tes 4:14

tabamo na:tudila:onala:. <sup>13</sup>Numa:la:, iba:te la: kowalubilitama: wade woko osiyodilona, ebema: modobola la: ibino tabamo wadenomamо eba tudila:olo ibi nilakapolo nemalagidilolenala:. Ega:walo me tanalo idila, modobola la:i mano taneba magumulo la: bilibilinomate milolo nilukulinala:.

<sup>14</sup>Ebema: aimano nanitabokobi midipi ekakiala:, ale la: kawiya nanaleta la: magumulo piyate damolama: deda:ona, modobola la:le ibi nanala:la: woko nanitabolo kosiyodilolenama:. Ega:walo piyate ibino nanitabokobi midi magumulo ilipo diyatawawaona ega:walo piyate elawoa:noma: deda:ona, modobola la:le la:i mano tabamo ega:walo osiyodilole tanalamо ibi nowalubiliyal:a:, iyo, la:le iyaiya epo epetapi bilibilinomo la:i mano tabamo dowalubila:wenakoma la:le iba:tamo samamo ubia:noma: akoeda:onakala:. <sup>f</sup> <sup>15</sup>Ega:walo me tanalo idila. La:i mano ilukuli magumulo idite iditamo kuba dosiyodilomene, ebe tetelo temeteme lawedawate kuba osiyodilodawatamo wiya akoikama:la:, wiyasiya modobola la:le tete bilibilinomolo la:i mano ubi kawonomamо niyatinkaiyala:, la: magumulo idite iditamo nilakapo eba awokalimilo iyaiya epo epetapi bilibilinomatamo atumu wadewade tanalo kapiya ka:kosiyodilola:wenama:. <sup>g</sup>

<sup>16</sup> Ebene tete bilibilinomolo la:le Godokono kalakalago eba ilukulinalo,<sup>h</sup> <sup>17</sup>idoko ega:walo egela bilibilinomolo eba:go tabo gela tanalo atepa:no, <sup>18</sup>wadewade tanalate maimio tetelo ega:walo olalati tanalate maimio tetelo ebatamo kalakala tabo nowadipalatenakiyala:. Nanitabola, me netewa-kapiya tanalo ebe Godote la:i mano ilukuli magumulo ulaema: ubi diyatina ebe tanalola, mabu la:le Ya:su Kelisoko magumulo eba ilukulinalo ebe wadewade tanalate la:godo lo nemaimionakoma:na:. <sup>i</sup>

<sup>19</sup>Ebema: Godokono Talena Uliyanate kebe woko kosiyodilonale ebe woko ako-odiyobala:<sup>j</sup> <sup>20</sup>iyo, kebe tetelo lumagi idite Godokono woki nanitabonomolo dawokalimene, modobola la:le ebe tabo lawa:wete kubama: akogelala:. <sup>21</sup>Wiyasiya la: nanisiwale, epate kebe iyaiya tabono tanalo Godokono mailamo da:kiyawaonaka, la:le ebe tabono tanalo bilibilinomo la:i mano wade wokiamo anagilama:wete nani tabonomomoma: samamo akogelala:. Me gabodo la:le Godokono nani tabono iyaiya tanalo kodakodalо eba watila:mota:nalo,<sup>k</sup> <sup>22</sup>iyaiya kuba tabo ega:walo osiyodilole tanalo bilibilinomo la:le walogabo apuamo na:midaliyal:a:

<sup>23</sup>Nanitabola, kebe dawate a nanitabokobi midipiatamo milo dikaeamena, ebe Kawodawa ebe Godotela, ebema: ale la: mabuma: ebe ma kunu toteomenakoma:, ebete la:i mano ilukuli tanalo bilibilinomo magumulo la: ebeno nani talenapima: eba midililo, ebete la:i mano

<sup>f</sup> 5:14 2Tes 3:6,11    <sup>g</sup> 5:15 Lom 12:17; 1Pit 3:9    <sup>h</sup> 5:16 Pil 4:4    <sup>i</sup> 5:18 Epe 5:20

<sup>j</sup> 5:19 Epe 4:30    <sup>k</sup> 5:21-22 1Yon 4:1

uliyanano woki ega:walo tepo magumuno ubi tanalo ega:walo ape kawonomono osiyodilole tanalo wadenomamo nulamelelamenakoma:ta. Kalakala kawonomola, me gabodo Kawodawa Ya:su Kelisokono pe tetelo kuba da:peso idite la: magumulo a:kitanamene.<sup>l</sup> <sup>24</sup> Numa:la:, Godote la: ebeno talenapima: keda:oaema: ka:la:minata, ebema: ebe modobola ebete ebe wade woko la: magumulo opoliyama:, iyo, ebete kebe tanalo osiyodilolema: tabo da:kiyawaona ebete ebe iyaiya tanalo nanitabonomolo bosiyodilolenakomene.

<sup>25</sup> Ebema: aimano nanitabokobi midipi ekakiala;, modobola la: atumu a mabuma: Godotamo na:towetoweonakiyalal;<sup>m</sup> <sup>26</sup> ega:walo la: daladabuta:wenakoma, modobola la: bilibilinomo epetapiate epetapino koto uwateuilo na:wiyamidauinakiyalal;. <sup>27</sup> Na Polote Godokono mailamo la: ma kunu analemata, la: me leta nanitabokobi midipi ekaki bilibilinomatamo neka:la:mioliyala:.

<sup>28</sup> Modobola aimano Kawodawa Ya:su Kelisokono nilakapo tanalote la:godolo nitanamene. Me naimano tabo uwomula. Taula.

---

<sup>l</sup> 5:23 2Tes 3:3    <sup>m</sup> 5:25 Kol 4:3; 2Tes 3:1